

四庫全書

經部

欽定四庫全書

經部

五禮通考卷一百二十

詳校官侍郎臣劉躍雲

給事中臣溫常綬覆勘

總校官進士臣繆琪

校對官庶吉士臣嚴福

謄錄監生臣胡宗高

欽定四庫全書

五禮通考卷第一百二十

刑部尚書秦蕙田撰

吉禮一百二十

祭先聖先師

明史太祖本紀洪武元年二月丁未以太牢祀先師孔子於國學

禮志洪武定制每歲仲春秋上丁皇帝降香遣官祀於

國學以丞相初獻翰林學士亞獻國子祭酒終獻先期  
皇帝齋戒獻官陪祀執事官皆散齋二日致齋一日前  
祀一日皇帝服皮弁服御奉天殿降香至日獻官行禮  
王圻續通考洪武二年夏四月丙戌詔天下通祀孔  
子遂賜學糧增師生廩膳上諭禮部尚書劉仲質曰  
孔子明帝王之道以教後世使君君臣臣父父子子  
綱常以正彝倫攸叙其功參乎天地今天下郡縣廟  
學並建而報祀之禮止行京師豈非闕典卿與儒臣

其定釋奠禮儀頒之天下學校令每歲春秋仲月通祀  
孔子乃有是詔初定制以春秋上丁皇帝御奉天殿傳制  
遣大臣以太牢祭至聖先師孔子於太學遣祭酒禮三獻  
樂六奏文舞六佾司府州縣衛學各提調官行事用少牢  
禮樂如太學樂不能備則已京府及附府縣行釋菜禮  
明史禮志洪武三年詔草諸神封號惟孔子封爵仍舊  
且令曲阜廟廷歲官給牲幣俾行聖公供祀事

王圻續通考洪武三年五月上如江淮府先謁文廟

幸學至南昌亦如之

明史禮志洪武四年禮部奏定儀物改初制籩豆之八為十籩用竹其簋籩登劍及豆初用木者悉易以瓷牲易以熟樂生六十人舞生四十八人引舞二人凡一百一十人禮部請選京民之秀者充樂舞生太祖曰樂舞乃學者事况釋奠所以崇師宜擇國子生及公卿子弟在學者豫教肄之

明會典洪武四年令進士釋褐詣國學行釋菜禮

熊氏禾曰道者天下通行之道其所以為教者自天子至於庶人一也先王建學必祀先聖先師自古至今未有以異獨五學之說不同禮家謂詩書禮樂各有其師所以為祀亦異則疑出於漢儒專門之附會三代以上大道未分必不至此夫京師首善之地莫先於天子之太學天子太學祀典宜自伏羲神農黃帝堯舜禹湯文武其道德功言載之六經傳在萬世若以伏羲為道之祖神農黃帝堯舜禹湯文武各以其次而列焉臯陶伊尹太公望皆見而知者周公不惟為法於天下而易詩書所載與夫周禮儀禮之書皆可傳於後世至若稷之立極陳常契之明倫敷教夷之降典益之贊德傳說之論學箕子之陳範是皆可以與享於先王者以此秩祀天子之學禮亦宜之若夫孔子兼祖述憲章之任其為天下萬世通祀則自天子下達矣

四年國子司業宋濂上孔子廟堂議曰世之言禮者咸取法於孔子不以古之禮祀孔子褻祀也褻祀不敬不敬則無福柰何今之人與古異也古者主人西面几筵在西也漢章帝幸魯祠孔子帝西面再拜開元禮先聖東向先師南向三獻官西向猶古意也今襲開元二十七年之制遷神南面非神道尚右之義矣古者木主棲神天子諸侯廟皆有主大夫束帛士結茅為殿無像設之事開元禮設先聖神座於堂上



兩楹間先聖東北皆莞席尚掃地而祭也今因開元  
八年之制搏土而肖像焉失神而明之之義矣古者  
灌鬯燭蕭求神於陰陽也今用熏鄉代之非簡乎古  
者朝覲會同郊廟祭饗皆設庭燎司烜共之火師監  
之示嚴敬也今以秉炬當之非瀆乎古之有道有德  
者使教焉死則以為樂祖祭於瞽宗謂之先師若漢  
禮有高堂生樂有制氏詩有毛公書有伏生也又凡  
始立學者必釋奠於先聖先師釋奠必有合謂國無

先聖先師則所釋奠者當與鄰國合若唐虞有夔伯  
夷周有周公魯有孔子則不合也當是時學者各祭  
其先師非其師弗學非其學弗祭學校既廢天下莫  
知所師孔子集羣聖之大成顏曾思孟實傳其道尊  
之以為先聖先師而通祀於天下固宜若七十二子  
止於國學設之庶幾弗悖禮意開元禮國學祀先聖  
孔子以顏子等七十二賢配諸州惟配顏子今以荀  
况之言性惡揚雄之事王莽王弼之宗莊老賈逵之

忽細行杜預之建短喪馬融之黨附勢家亦廁其中  
吾不知其何說也古者立學專以明倫子雖齊聖不  
先父食久矣故禹不先鯀湯不先契文王不先不窋  
宋祖帝乙鄭祖厲王猶尚祖也今回參伋坐饗堂上  
而其父列食於廡間顛倒彛倫莫此為甚吾不知其  
何說也古者士見師以菜為贄故始入學者必釋菜  
以禮其先師其學官時祭皆釋奠今專用春秋非矣  
釋奠有樂無尸釋菜無樂是二釋之重輕以樂有無

也今襲用魏漢津所製大晟樂乃先儒所謂亂世之  
音可乎哉古者釋奠釋菜名義雖存而儀注皆不可  
考開元禮彷彿儀禮饋食篇節文為詳所謂三獻獻  
後各飲福卽尸酢主人主婦及賓之義也今憚其煩  
唯初獻得行之可乎哉他如廟制之非宜冕服之無  
章器用雜乎雅俗升降昧乎左右此類甚多雖更僕  
不可盡若乃建安熊氏欲以伏羲為道統之宗神農  
黃帝堯舜禹湯文武次而列焉臯陶伊尹太公周公

暨稷契夷益傳說箕子皆天子公卿之師式宜秩祀  
天子之學若孔子實兼祖述憲章之任其為通祀則  
自天子下達苟如其言則道統益尊三皇不汨於醫  
師太公不辱於武夫矣昔周立四代之學學有先聖  
虞庠以舜夏學以禹殷學以湯東膠以文王復各取  
當時左右四聖成其德業者為之先師以配享焉此  
固天子立學之法也上不喜謫濂安遠知縣

蕙田案潛溪此議謂先聖不宜肖像荀揚王

賈杜馬不宜從祀顏曾思之父不當列於兩  
廡及以古聖皇為先聖其臣為先師皆為嘉  
靖時張孚敬等竊取實先生之卓見也至謂  
先聖宜東向用薰蕕為簡秉炬為瀆七十子  
當止於國學大成樂為亂世之音則泥古而  
失禮時為大之義矣

兗州府志洪武五年作文廟成上遂視學釋菜  
春明夢餘錄是年罷孟子配享雷震謹身殿

王圻續通考洪武六年上曰我聞孟子辨異端闢邪說  
發明孔子之道宜配享如故

明史錢唐傳洪武二年詔孔廟春秋釋奠止行於曲  
阜天下不必通祀唐伏闕上疏言孔子垂教萬世天  
下共尊其教故天下得通祀孔子報本之禮不可廢  
侍郎程徐亦疏言古今祀典獨社稷三皇與孔子通  
祀天下民非社稷三皇則無以生非孔子之道則無  
以立堯舜禹湯文武周公皆聖人也然發揮三綱五

常之道載之於經儀範百王師表萬世使世愈降而人極不墜者孔子力也孔子以道設教天下祀之非祀其人祀其教也祀其道也今使天下之人讀其書由其教行其道而不得舉其祀非所以維人心扶世教也皆不聽久之乃用其言帝嘗讀孟子至草芥寇讐語謂非臣子所宜言議罷其配享詔有諫者以大不敬論唐抗疏入諫曰臣為孟軻死死有餘榮時廷臣無不為唐危帝鑒其誠懇不之罪孟子配享亦旋



復然卒命儒臣修孟子節文云

明史樂志洪武六年定祀先師孔子樂章迎神咸和之曲奠帛寧和之曲初獻安和之曲亞終獻景和之曲徹饌咸和之曲送神咸和之曲

蕙田案六章皆襲宋大晟樂府之詞已見前明會典洪武七年仲春上丁日食改用仲丁

明史太祖本紀洪武十五年四月丙戌詔天下通祀孔子五月乙丑太學成釋奠於先師孔子

禮志洪武十五年新建太學成廟在學東中大成殿左  
右兩廡前大成門門左右列戟二十四門外東為犧牲  
厨西為祭器庫又前為靈星門自經始以來駕數臨視  
至是落成遣官致祭帝既親詣釋奠又詔天下通祀孔  
子并頒釋奠儀注凡府州縣學遵豆以八器物牲牢皆  
殺於國學三獻禮同十哲兩廡一獻其祭各以正官行  
之有布政司則以布政司官分獻則以本學儒職及老  
成儒士充之每歲春秋仲月上丁日行事初國學主祭

遣祭酒後遣翰林院官然祭酒初到官必遣一祭

圖書編天下各布政司府州縣學釋奠儀注各布政司及府州縣長官一員行三獻禮或提調官及儒學教授等官行一獻禮齋戒正祭前三日獻官并陪祭官執事人等沐浴更衣散齋二日致齋一日省牲正祭前一日執事者設香案於宰牲房外贊引引獻官常服詣省牲所贊省牲執事者牽牲從香案前過入宰牲房宰之遂以毛血少許盛於盤贊引唱省牲畢其餘毛血以淨器

盛貯待祭畢埋之正祭每歲春秋二仲月上丁日將行禮起鼓初嚴遍燃庭燎香燭鼓再嚴樂舞生執事者各序立於丹墀兩旁鼓三嚴贊引引各獻官至廟門下立通贊唱樂舞生各就位樂舞生各以序立於廟庭奏樂之所司節者分引至丹墀陞東西兩旁各序立於舞佾之位司節在東則退至東三班舞生之首相向在西則退至西三班舞生之首相向通執事者各司其事各執事亦各以序進就位訖通贊唱分獻官各就位各贊引

引各分獻官至拜位各贊引退立於東西訖通贊唱獻  
官就位贊引引獻官至拜位贊引退立於獻官東西兩  
傍相向立訖通贊唱瘞毛血執事者奉毛血由廟中門  
出四配東西哲由左右門出兩廡隨之瘞於坎遂啟俎  
蓋通贊唱迎神舞生橫執其籥麾生舉麾唱迎神樂奏  
咸和之曲擊祝作樂通贊唱鞠躬拜興拜興拜興  
平身獻官以下俱拜訖麾生偃麾樂止櫟啟通贊唱奠  
帛行初獻禮奉帛者各奉帛執爵者各執爵贊引詣獻

官前唱詣盥洗所引獻官至盥洗所司盥者酌水贊引  
唱搯笏獻官搯笏盥畢進巾贊引唱出笏獻官出笏贊  
引唱詣酒樽所引獻官至酒樽所贊引唱司樽者舉罌  
酌酒執爵者以爵受酒同捧帛者在獻官前行先師帛  
爵由中門入四配帛爵由左門進各於神案之側朝上  
立贊引隨引獻官亦由左門入唱詣至聖先師孔子神  
位前麾生舉麾唱初獻樂奏寧和之曲擊祝作樂贊引  
引獻官至神位前唱跪獻官跪唱搯笏獻官搯笏捧帛

者轉身西向跪進帛於獻官右獻官接帛贊引唱奠帛  
獻官奠帛以帛授接帛者奠於神位前案上執爵者轉  
身西向跪進爵於獻官右獻官接爵贊引唱獻爵獻官  
獻爵以爵授接爵者奠於神位前贊引唱出笏獻官出  
笏贊引唱俯伏興平身詣讀祝位讀祝者位設於堂中  
香案前贊引引獻官至祝位麾生偃麾樂暫止讀祝者  
跪取祝文退立於獻官之左贊引唱獻官并讀祝者皆  
跪通贊隨唱衆官皆跪陪祭者皆跪訖贊引唱讀祝讀

祝者讀畢仍將祝文跪置於祝案上退堂西朝上立贊引與通贊同唱俯伏興平身麾生舉麾不唱樂生接奏在先未終之樂贊引唱詣復聖顏于神位前引獻官至神位前唱跪搯笏獻官搯笏捧帛者跪於獻官右進帛於獻官獻官接帛贊引唱奠帛獻官奠帛以帛授接帛者奠於神位案上執爵者跪於獻官右進爵於獻官獻官接爵贊引唱獻爵獻爵以爵授接爵者奠於神位前贊引唱出笏獻官出笏贊引唱俯伏興平身贊引



唱詣宗聖曾子神位前儀同復聖位通贊隨唱行分獻  
禮各贊引詣各分獻官前同唱詣盥洗所各贊引引各  
分獻官至洗所司盥者酌水贊引同唱搯笏各分獻官  
搯笏盥洗畢進巾贊引同唱出笏各分獻官出笏贊引  
同唱詣酒罇所引各分獻官詣罇所同唱司罇者舉罇  
酌酒各執爵者以虛爵受酒與捧帛者俱在分獻官前  
行至堂及兩廡神案之側朝位立俟正廟贊引唱詣述  
聖子思子神位前各贊引隨唱詣東哲神位前各贊引

引分獻官東哲由左門進詣神位前同唱同跪唱搢笏  
獻官并分獻官搢笏東哲捧帛者轉跪於分獻右進帛  
獻官分獻官俱接帛贊引同唱奠帛獻官分獻官獻帛  
以帛授接帛者奠於神位前案上捧爵者轉身進爵如  
進帛儀餘儀俱同前贊引唱詣亞聖孟子神位前各贊  
引隨唱詣西哲東廡西廡神位前各贊引引各分獻官  
西哲東廡西廡各詣神位前同唱跪同唱搢笏獻官并  
各分獻官搢笏東廡捧帛者轉身跪於分獻官右亞聖

十哲兩廡捧帛者跪於獻官分獻官左進帛獻官分獻  
官接帛贊引同唱奠帛獻官分獻官奠帛以帛授接帛  
者奠於神位前案上捧爵者轉身進爵如進帛儀獻官  
分獻官接爵贊引同唱獻爵獻官分獻官獻爵以爵授  
接爵者奠於各神位前贊引同唱出笏各分獻官出笏  
贊引同唱俯伏興平身贊引同唱復位麾生偃麾櫟敵  
樂止各贊引引各獻官至原拜位立執事者亦隨至樽  
所立俟通贊唱行亞獻禮贊引詣獻官前唱詣酒樽所

引獻官至酒罇所贊引唱司罇者舉罇酌酒各執爵以  
虛爵受酒前行至廟門如初獻儀贊引引獻官由左門  
入唱詣至聖先師孔子神位前麾生舉麾唱亞獻樂奏  
安和之曲擊柷作樂贊引引獻官至神位前如初獻爵  
之儀行禮訖贊引引獻官如前出至原位麾生偃麾櫟  
敵樂止通贊唱行終獻禮贊引引獻官并執事者儀同  
亞獻麾生舉麾唱終獻樂奏景和之曲擊柷作樂行禮  
復位俱如初惟執爵者不必出廟外俱在廟兩旁立候

徹饌麾生偃麾櫟啟樂止通贊唱飲福受胙進福酒者  
捧爵進福胙者捧盤立於神位之東又令一執事取正  
壇羊肩胙置於盤贊引唱詣飲福位飲福乃讀祝位也  
又令二執事先立於廟內西旁贊引引獻官至飲福位  
捧福酒捧福胙轉身向西立於獻官旁前廟內二執事  
行於獻官西與捧爵者捧胙者相對立贊引唱跪搢笏  
獻官跪搢笏進福酒者跪於獻官右進爵於獻官贊引  
唱飲福酒獻官接酒飲訖西旁接福酒者跪於獻官左

接爵捧福胙者跪於獻官右進胙於獻官贊引唱受胙  
獻官接胙訖兩旁接福胙者跪於獻官之左接胙由中  
門出贊引唱出笏獻官出笏贊引唱俯伏興平身復位  
贊引引獻官至原拜位訖通贊唱鞠躬拜興拜興平身  
各官拜訖通贊唱徹饌麾生舉麾唱徹饌樂奏咸和之  
曲擊祝作樂執事各於神位前將邊豆稍移動復立於  
原位舞生直執其籥與翟同司節在東者進立於東一  
班舞生之首舉節朝上分引舞生於角道東西序立相

向樂止麾生偃麾櫟敵舞止通贊唱送神麾生舉麾唱  
送神奏咸和之曲擊祝作樂通贊唱鞠躬拜興拜興拜  
興拜興平身各官拜訖通贊唱讀祝者捧祝進帛者捧  
帛執事各詣神位前待讀祝者先跪取祝文捧帛者跪  
取帛轉身向外立通贊唱各詣瘞所捧帛祝者過訖贊  
引唱詣望瘞位各贊引引獻官陪祭官至瘞所贊引唱  
祝版一帛一段數至九段待焚訖樂盡麾生偃麾櫟敵  
樂止贊引通贊同唱禮畢

月朔釋菜儀其日清晨執事者各司其事分獻官各官  
分列於大成門內監生排班俟獻官至通贊唱排班獻  
官以下各就位通贊唱班齊鞠躬拜興拜興平身引贊  
詣獻官前唱詣盥洗所獻官盥手悅手訖引贊唱詣酒  
罇所司罇者舉罇酌酒訖引贊唱詣至聖先師孔子神  
位前跪獻爵俯伏興平身執事者行事並同引贊唱詣  
復聖顏子神位前宗聖曾子神位前述聖子思子神位  
前亞聖孟子神位前儀並同十哲兩廡分獻官一同行



禮畢引贊同唱復位引贊導獻官分獻官至原拜位立  
通贊唱鞠躬拜興拜興平身禮畢

王圻續通考是年十二月復幸學先是五月丁巳上謂  
禮部尚書劉仲質曰國學新成朕將釋菜令諸儒議禮  
議者曰孔子雖聖人臣也禮宜一奠而再拜朕以為孔  
子明道德以教後世豈可以職位論哉昔周太祖入孔  
子祠將拜左右曰孔子陪臣不宜拜周太祖曰百世帝  
王之師敢不拜乎遂再拜朕深嘉其明斷不惑於左右

之言今朕有天下敬禮百神於先師之禮宜加尊重仲質乃與儒臣定議上服皮弁服執圭詣先師再拜獻爵後又再拜退易服詣彛倫堂祭酒司業博士助教進講賜坐侍臣以次坐於東西講畢宣諭學官諸生而還明日祭酒率學官上表謝恩已未遣官祭先師孔子以太牢禮畢祭酒吳顥等升堂諸生受業乙丑上幸國子監謁先師孔子釋菜禮成退御講筵祭酒吳顥等以次講畢上謂之曰中正之道無踰於儒上古聖人不以儒名

而德行實儒後世儒之名立雖有儒名或無其實孔子  
生於周末身儒道行儒行立儒教率天下後世之人皆  
欲其中正惜乎魯國君臣無能用之者當時獨一公父  
文伯之母知其賢責其子之不能從則一國君臣可愧  
矣卿等為師表正當以孔子之道為教使諸生咸趨乎  
正則朝廷得人矣復命取尚書大禹臯陶謨洪範親為  
講說反覆開諭羣臣聞者莫不悚悅遂賜宴竟日而還  
丙寅祭酒吳顯率博士龔敷上表謝各賜羅衣二襲官

民生許恒等四百三十人各賜春夏布衣

闕里志洪武十五年太學成孔子以下去塑像設木  
主

蕙田案此國學去塑像尚未行之天下也故  
嘉靖間復行之

明史禮志洪武十七年勅每月朔望祭酒以下行釋菜  
禮郡縣長以下詣學行香

王圻續通考洪武十七年議大成樂

春明夢餘錄洪武二十年罷武廟獨尊孔子

蕙田案太公之功焉得與孔子並太祖此舉

可破千年黷祀之典

明史禮志洪武二十六年頒大成樂於天下

明會典洪武二十六年頒大成樂器於天下府學令州縣如式製造

釋奠儀一齋戒與祀帝王同一省牲牛一山羊五豕九鹿一兔五一陳設正壇犢一羊一豕一登一鉶二籩豆

各十簋簋各二帛一白色禮神制帛共設酒尊三爵三  
篚一於壇東南西向祝文案於壇西四配位每位羊一  
豕一登一鉶二籩豆各十簋簋各一爵三帛一篚一十  
哲位東五壇豕一分五帛一篚一爵三每位鉶一籩豆  
各四簋簋各一酒盞一西五壇陳設同東廡五十三位  
共十三壇共豕一帛一篚一爵一每壇籩豆各四簋簋  
各一酒盞四西廡五十二位共十三壇陳設同 一正  
祭典儀唱舞生就位執事官各司其事分獻官陪祀官

各就位贊引引獻官至盥洗所贊詣盥洗位搯笏出笏  
引至拜位贊就位典儀唱迎神奏樂樂止贊四拜通贊  
陪祭官同典儀唱行初獻禮奏樂執事官捧帛爵詣各  
神位前贊引導遣官贊詣大成至聖文宣王神位前贊  
搯笏贊獻帛執事以帛進奠訖執事以爵進贊引贊獻  
爵出笏贊詣讀祝位樂暫止跪傳贊衆官皆跪贊讀祝  
讀祝官取祝跪於獻官左讀訖贊俯伏興平身贊詣交  
國復聖公神位前搯笏獻爵出笏詣廊國宗聖公神位

前沂國述聖公神位前鄒國亞聖公神位前儀並同前  
贊復位樂止典儀唱行亞獻禮奏樂執事以爵獻於神  
位前樂止典儀唱行終獻禮奏樂儀同亞獻樂止典儀  
唱飲福受胙贊詣飲福位跪搢笏執事以爵進贊飲福  
酒執事以胙進贊受胙出笏俯伏興平身復位贊兩拜  
傳贊陪祀官同典儀唱讀祝官捧祝掌祭官捧帛饌各  
詣瘞位典儀唱望瘞奏樂贊引官贊詣望瘞位樂止贊  
禮畢 一分獻官儀注分獻以翰林院修撰等官二員



國子博士等官二員典儀唱分獻官陪祭官各就位各  
二拜候讀祝訖唱分獻官行禮贊引贊詣盥洗所贊搢  
笏贊出笏贊升壇贊詣神位前贊搢笏執事以帛進於  
分獻官執事以爵進於分獻官獻訖贊出笏贊復位亞  
獻終獻同典儀唱望瘞各詣瘞位樂止贊禮畢 一祝  
文維洪武某年歲次某月朔越某日皇帝遣具官某致  
祭於大成至聖文宣王惟王德配天地道冠古今刪述  
六經垂憲萬世謹以牲帛醴齊粢盛庶品祗奉舊章式

陳明薦以充國復聖公郟國宗聖公沂國述聖公鄒國亞聖公配尚享

明會典洪武二十九年駕幸太學行釋菜禮黜揚雄從祀進漢董仲舒

明史禮志洪武二十八年以行人司副楊砥言罷漢揚雄從祀益以董仲舒

蕙田案會典及禮志年月不符存以俟考

明史太祖本紀洪武三十年十月乙未重建國子監先

師廟成

禮志三十年以國學孔子廟隘命工部改作其制皆帝所規畫大成殿門各六楹靈星門三東西廡七十六楹神廚庫皆八楹宰牲所六楹

春明夢餘錄京師文廟在城北國學之左元太祖置先聖廟於燕京以舊樞密院為之成宗大德十年京師廟成明太祖改為北平府學廟如故

明史禮志永樂初建廟於太學之東

春明夢餘錄永樂元年八月遣官釋奠仍改稱國子監  
孔子廟尋建新廟於故址中為廟南向東西兩廡丹墀  
西為瘞所正南為廟門門東為宰牲亭神厨西為神庫  
持敬門門正南為外門正殿初名大成殿

明史成祖本紀永樂四年三月辛卯朔釋奠於先師孔  
子

王圻續通考永樂四年辛學禮部尚書鄭賜言宋制謁  
孔子服靴袍再拜上曰見先師禮不可簡必服皮弁行

四拜禮於是進視學儀注即洪武中所定也

明會典永樂八年正文廟聖賢繪塑衣冠令合古制

蕙田案闕里志稱洪武五年去南京塑像此仍舊未毀故也

十九年北京國子監既定其南監春祭命祭酒行禮稱  
皇帝謹遣

明史禮志宣德三年以萬縣訓導李譯請命禮部考正  
從祀先賢名位頒示天下

明會典正統元年判定從祀名爵位次頒行天下

明史英宗前紀正統二年六月乙亥以宋胡安國蔡沈  
真德秀從祀孔子廟庭

禮志正統二年禁天下祀孔子於釋老宮

明史禮志孔顏孟三氏子孫教授裴侃言天下文廟惟  
論傳道以列位次闕里家廟宜正父子以叙彝倫顏子  
曾子子思子也配享殿庭無繇子皙伯魚父也從祀廊  
廡非惟名分不正抑恐神不自安况叔梁紇元已追封

啟聖王創殿於大成西崇祀而顏孟之父俱封公惟伯魚子皙仍侯乞追封公爵偕顏孟父俱配啟聖王殿帝命禮部行之仍議加伯魚子皙封號

蕙田案此止行之家廟未及國學及府州縣也

明會典正統八年追封元吳澄為臨川郡公從祀

明史禮志正統八年慈利教諭蔣明請祀元儒吳澄大學士楊士奇等言當從祀從之

蕙田案吳澄之祀罷於嘉靖九年

英宗前紀正統九年三月辛亥朔新建太學成釋奠於先師孔子

景帝本紀景泰二年二月辛未釋奠於先師孔子

明會典景泰六年奏准以兩廡祭品儉薄增豕四棗粟各五十斤黍稷各一斗形鹽五十斤南京國子監一體增設

成化二年封董仲舒為廣川伯胡安國建寧伯蔡沈崇



安伯真德秀浦城伯

王圻續通考成化四年彭時奏謂漢晉之時道統無傳所幸有專門之師講誦聖經以詔學者斯文賴以不墜此馬融范甯諸人雖學行未純亦不得而廢

明史禮志成化十二年從祭酒周洪謨言增樂舞為八佾籩豆各十二

祭酒周洪謨於成化十二年七月奏請加孔子封號先儒羅從彥嘗曰唐既封先聖為王襲其舊號可也

加之帝號而褒崇之亦可也所封乃當時天王之王  
既正南面之位宜服冕十二旒衣十二章十篋十豆  
各增為十二六佾之舞增為八佾之舞且古者鳴球  
琴瑟堂上之樂笙鏞祝敔堂下之樂而干羽舞於兩  
階今舞羽居上而樂器居下非古制也宜令典樂者  
改正上命禮官議之於是尚書鄒幹言洪武中新建  
南京太學止用神主不設塑像故當時祭酒宋訥奉  
勅撰文有像不土繒祀以神主百年夷習乃革之語

今北監所有塑像皆因元舊不忍撤毀耳以此觀之  
冕旒盖因塑像之舊而遵豆佾舞之數則祖宗斟酌  
已有定式俱當仍舊惟佾舞居下則行太常寺考正  
之九月周洪謨又言孔子封號冕服遵豆佾舞等事  
禮部稱洪武年間太學止用神主塑像非聖朝之制  
臣以為孔子之道不外禮樂今欲體孔子之道亦莫  
先乎禮樂唐開元中封孔子為文宣王被以衮冕樂  
用宮縣樂既用天子之宮縣服必用天子之衮冕是

唐之奉孔子者已用天子之禮樂矣今冕服既用天子禮而佾舞則用諸侯之樂以禮論樂則樂不備以樂論禮則禮為僭孔子周人當用周制其所封乃當時天王之王非後世國王之王合無將十籩十豆增為十二籩十二豆六佾之舞增為八佾之舞器數既加則佾舞與冕服相稱而樂不為缺矣准奏籩豆增為十二六佾增為八佾通行天下

春明夢餘錄成化十三年閏二月丁丑釋奠初用八佾

遵豆各十二

明會典成化二十二年二月朔當釋菜值上丁令以次日釋菜

闕里志弘治元年孝宗皇帝登極駕幸太學釋奠孔子以吏部尚書王恕言詔先師位加幣用太牢改分獻為分奠

學士程敏政於弘治元年考正祀典疏畧先師孔子有功德於天下萬世其廟庭之間侑食之人必得文

與行兼名與實副有功於聖門而無疵於公議者庶足以稱崇德報功之意若侑食者非其人則豈惟先師臨之神不顧歆將使典模範者莫知所教為弟子者莫知所學世教不明人心不淑通於天下而施及後世其為闕繫豈特一時一方之可比哉謹畫一條陳上瀆聖覽 一唐貞觀二十一年始以左邱明等二十二人從祀孔子廟庭當時聖學不明議者無識拘於註疏謂釋奠先師如詩有毛公禮有高堂生書

有伏生之類遂以專門訓詁之學為得聖道之傳而  
并及馬融等臣考歷代正史馬融初應鄧騭之名為  
秘書歷官南郡太守以貪濁免官髡徙朔方自刺不  
殊又不拘儒者之節前授生徒後列女樂為梁冀草  
奏殺忠臣李固作西第頌以美冀為正直所羞即是  
觀之則衆醜備於一身五經為之掃地後世乃以其  
空言目為經師使侑坐於孔子之庭臣不知其何說  
也劉向初以獻賦進喜誦神仙方術嘗上言黃金可

成鑄作不驗下吏當死其兄陽城侯救之獲免所著  
洪範五行傳最為舛駁使箕子經世之微言流為陰  
陽術家之小技賈逵以獻頌為郎不修小節專以附  
會圖讖以至貴顯蓋左道亂政之人也王弼與何晏  
倡為清談所註易傳祖老莊而范甯追究晉室之亂  
以為王何之罪深於桀紂何休則止有春秋解詁一  
書黜周王魯又註風角等書班之於孝經論語蓋異  
端邪說之流也戴聖為九江太守治行多不法懼何



武劾之而自免後為博士毀武於朝及子賓客為盜繫獄而武平心決之得不死則又造謝不慙先儒謂聖禮家之宗而身為賊吏子為賊徒可為世鑒王肅在魏以女適司馬昭當是時昭篡魏之勢已成肅為世臣封蘭陵侯官至中領軍乃坐觀成敗及毋邱儉文欽起兵討賊肅又為司馬師畫策以濟其惡若好人佞已乃其過之小者杜預所著亦止有左氏經傳集解其大節蓋無可稱如守襄陽則數饋遺洛中要

人曰懼其為害耳非以求益也伐吳之際因斫瘿之  
譏盡殺江陵之人以吏則不廉以將則不義凡此諸  
人其於名教得罪非小而議者為能守其遺經轉相  
授受以待後之學者不為無功臣竊以為不然夫守  
其遺經若左邱明公羊高穀梁赤之於春秋伏勝孔  
安國之於書毛萇之於詩高堂生之於儀禮后蒼之  
於禮記杜子春之於周禮可以當之蓋秦火之後惟  
易以卜筮僅存而餘經非此九人則幾乎熄矣此其

功之不可泯者以之從祀可也若融等又不過訓詁此九人所傳者耳况其書行於唐故唐得以備經師之數祀之今當理學大明之後易用程朱詩用朱子書用蔡氏春秋用胡氏又何取於漢魏以來駁而不正之人使安享天下之祀哉夫所以祀之者非徒使學者誦其詩讀其書亦將識其人而使之尚友也臣恐學者習其訓詁之文於身心未必有補而考其奸諂淫邪貪墨恠妄之迹將自甘於效尤之地曰先賢

亦若此哉其禍儒害道將有不可勝言者至於鄭衆  
盧植鄭元服虔范甯五人雖若無過然其所行亦未  
能以窺聖門所著亦未能以發聖學若五人者得預  
從祀則漢唐以來當預者尚多臣愚乞將戴聖劉向  
賈逵馬融何休王肅王弼杜預八人褫爵罷祀鄭衆  
盧植鄭元服虔范甯各祀於其鄉后蒼在漢初說禮  
數萬言號后氏曲臺記戴聖等皆受其業蓋今禮記  
之書非后氏則不復傳於後矣乞加封爵與左邱明

等一體從祀則偽儒免欺世之名賢者受專門之祀而情文兩得矣 一孔子弟子見於家語自顏回而下七十六人家語之書出於孔氏當得其實而司馬遷史記所載多公伯寮秦冉顏何三人文翁成都廟壁所畫又多蘧瑗林放申枨三人先儒謂後人以所見增益殆未可據臣考宋邢昺論語註疏申枨孔子弟子在家語作申續史記作申黨其實一人也今廟庭從祀申枨封文登侯在東廡申黨封淄川侯在西

庶重復無稽一至於此且公伯寮愬子路以阻孔子  
乃聖門之蝨蝨而孔子稱瑗為夫子決非及門之士  
林放雖嘗問禮然家語史記邢昺註疏朱子集註俱  
不載諸弟子之列秦冉顏何疑亦為字畫相近之誤  
如申枨申黨者但不可考耳臣愚以為申枨申黨位  
號宜存其一公伯寮秦冉顏何蘧瑗林放五人既不  
載於家語七十子之數宜罷其祀若瑗放二人不可  
無祀則乞祀瑗於衛祀放於魯或附祭於本處鄉賢

祠仍其舊爵以見優崇賢者之意亦庶乎名實相符而不舛於禮也洪武二十九年行人司司副楊砥建議請黜揚雄進董仲舒太祖高皇帝嘉納其言而行之主張斯道以淑人心可謂大矣然荀况揚雄實相伯仲而况以性為惡以禮為偽以子思孟子為亂天下以子張子夏子游為賤儒故程子有荀卿過多揚雄過少之說今言者欲并黜况之祀宜也然臣竊以為漢儒莫若董仲舒唐儒莫若韓愈而尚有可議者

一人文中子王通是也通之言行先儒之語已多大約以為僭經而不得比於董韓云爾臣請斷之以程朱之說程子曰王通隱德君子也論其粹處殆非荀揚所及若續經之類皆非其作然則程子豈私於通哉正因其言之粹者而知其非僭經之人耳朱子曰文中子論治體處高似仲舒而本領不及爽似仲舒而純不及又曰韓子原道諸篇若非通所及者然終不免文士之習利達之求若覽古今之變措諸事業



恐未若通之致懇惻而有條理也至於河汾師道之立出於魏晉佛老之餘迨今人以為盛則通固豪傑之士也今董韓並列從祀而通不預疑為闕典臣又案宋儒自周子以下九人同列從祀而尚有可議者一人安定胡瑗是也瑗之言行先儒之論已詳大約以為少著述而不得比於濂洛云爾臣亦請斷之以程朱之說程子者詳學制曰宜建尊賢堂以延天下道德之士如胡瑗張載邵雍使學者得以矜式朱子

小學書亦備載瑗事以為百世之法臣以為自秦漢  
以來師道之立未有過瑗者矧程子於瑗之生也欲  
致其與張邵並居於尊賢之堂其沒也乃不得與張  
邵並侑於宣聖之廟其為闕典或又甚矣况宋端平  
二年議增十賢從祀以瑗為首若以為瑗無著述之  
功則元之許衡亦無著述但其身教之懿與瑗相望  
誠有不可偏廢者臣考之禮有道有德教於學者死  
則為樂祖祭於瞽宗鄉老先生歿則祭於社若通瑗

兩人之師道百世如新得加封爵使與衡得並列祀於學官最為得意是年禮科右給事中張九功奏言孔子之道大同天地從祀諸賢豈容或苟如荀况馬融王弼揚雄皆在所當黜今之儒臣禮部侍郎兼翰林學士薛瑄在所當入命禮部會議於是尚書周經等僉言揚雄已黜於洪武時而薛瑄嘗與元儒劉因並欲從祀以大學士楊廷和謂其無所著述而止自餘皆有羽翼聖經之功宜仍舊從祀

蕙田案此疏當時雖未允行嘉靖九年所定  
實本於此

四年南京國子監祭酒謝鐸奏十哲七十二子以及  
左氏以下二十二入其所當黜陟者先儒程子與熊  
去非已有定論但此外猶有不能無疑者有若龜山  
先生楊時程門高弟伊洛正傳息邪放淫以承孟氏  
不愧南軒所稱繼往開來吾道南矣實演晦翁之派  
雖其晚節一出不克盡從其言而新經之闢誠足以

衛吾道如是而不預從祀之列臣竊惑焉又若臨川  
郡公吳澄著述雖不為不多行檢則不無可議生長  
於淳祐貢舉於咸淳受宋之恩者已如此其久為國  
子司業為翰林學士歷元之官者乃如彼其榮迹其  
所為曾不及洛邑之頑民何敢望首陽之高士昔人  
謂其專務聖賢之學卓然進退之際不識聖賢之於  
進退果如是否乎如是而猶在從祀之列臣固不能  
以無惑乞勅陞時以上附宋諸賢之位斥澄以下從

莽大夫之列不惟天下之公論允愜而於世道教化亦不為無補矣

明史孝宗本紀弘治八年七月丁亥封宋儒楊時為將樂伯從祀孔子廟庭

禮志八年楊時從祀位司馬光之次

大學士徐溥等言諸儒從祀孔門非有功斯道不可然必取證於大儒之說斯可以合人心之公考程氏遺書及諸子伊洛淵源錄所載龜山楊氏行狀墓誌

等文俱稱其造養深遠踐履純固溫然無疾言遽色  
與明道程子相似方其學成而歸程子目送之曰吾  
道南矣然則是道也豈易言哉自兩程子嗣孔孟不  
傳之統及門之士得以道見許者龜山一人而已蓋  
龜山一傳為豫章羅氏再傳為延平李氏以授朱子  
號為正宗文定胡氏親承指授而春秋之傳作南軒  
張氏上溯淵源而太極之義闡心學所漸悉本伊洛  
使天下之人曉然知虛寂之非道訓詁之非學詞華

之非藝則龜山傳道之功不可誣矣崇宣之世京黼  
柄國躋王安石於配享位次孟子而頌其新經以取  
士僭聖叛經凡數十年龜山入朝首請黜其配享不  
令廁宣聖之廟庭廢其新經不令蠹學者之心術使  
天下之人知邪說之當息詖行之當距淫詞之當放  
則龜山衛道之功亦不可掩或有疑其出處之際而  
少其著述之功則朱子謂龜山之出惟文定公之言  
最公曰當時若能聽用決須救得一半胡文定亦曰



蔡氏焉能免之然則以出處見疑者未考之過也龜  
山值洛學黨禁之餘指示學者以大本所在體驗之  
功轉相授受而朱子得聞其指訣則見於何錫之書  
朱子於理一分殊之論稱其年高德盛而所見益精  
則見於西銘之跋要之無龜山則無朱子而龜山之  
道非知德者殆未可輕議然則以著述見少者亦未  
考之過也又崇元史至正二十一年因杭州路照磨  
胡瑜建言已將龜山與延平李氏文定胡氏九峯蔡

氏西山真氏俱加封爵列於從祀以世變不及徧行天下此殆近於禮所謂有其舉之莫敢廢者然則親講於龜山若文定私淑於龜山若朱張咸在侑食近私淑於朱子若蔡真遠私淑於朱子若許吳亦在侑食獨其師有傳道衛道之功可以繼往開來抑邪與正者反不預焉揆之人心誠為闕典考大儒之定論參前代之故實伸弟子從師之義慰後學向道之心以龜山躋於從祀宜合公論奉旨先行

蕙田案此議最為允協

弘治九年增樂舞為七十二人如天子之制

王圻續通考弘治十四年國子監管祭酒事禮部右侍郎謝鐸言學校之設皆所以明人倫也顏曾思三子配享堂上而其父則皆列祀廡下冠履倒置有是理哉為今之計莫若於闕里立廟祀叔梁紇以顏路曾皙孔鯉諸賢配享如先儒熊去非之論庶幾各全其尊而神靈安妥也吳澄親為有宋之遺臣醜顏食

元之官祿名節掃地正宜律以春秋大義罷黜從祀  
此前一事人雖屢言而未見施行此後一事臣亦嘗  
言而未蒙俞允每當奉祀對越之際輒起頓顛不安  
之心心所不安又不得不發之言耳

蕙田案兩議俱至嘉靖時行

武宗本紀正德元年三月甲申釋奠於先師孔子

闕里志嘉靖元年世宗登極駕幸太學

世宗本紀嘉靖九年六月癸亥立曲阜孔顏孟三氏學

冬十一月辛丑更正孔廟祀典定孔子謚號曰至聖先師孔子

禮志嘉靖九年大學士張璁言先師祀典有當更正者叔梁紇乃孔子之父顏路曾皙孔鯉乃顏曾子思之父三子配享廟庭紇及諸父從祀兩廡原聖賢之心豈安請於大成殿後別立室祀叔梁紇而顏路曾皙孔鯉配之帝以為然因言聖人尊天與尊親同今籩豆十二牲用犢全用祀天儀亦非正禮其謚號章服悉宜改正璁

緣帝意言孔子宜稱先聖先師不宜稱王祀宇宜稱廟  
不稱殿祀宜用木主其塑像宜毀籩豆用十樂用六佾  
配位公侯伯之號宜削止稱先賢先儒其從祀申黨公  
伯寮秦冉等十二人宜罷林放蘧瑗等六人宜各祀於  
其鄉后蒼王通歐陽修胡瑗蔡元定宜從祀帝命禮部  
會翰林諸臣議編修徐階疏陳易號毀像之不可帝怒  
謫階官乃御製正孔子祀典說大畧謂孔子以魯僭王  
為非寧肯自僭天子之禮復為正孔子祀典申記俱付

史館摠因作正孔子廟祀典或問奏之帝以為議論詳正并令禮部集議於是御史黎貫等言聖祖初正祀典天下嶽瀆諸神皆去其號惟先師孔子如故良有深意陛下疑孔子之祀上擬祀天之禮夫子之不可及也猶天之不可階而升雖擬諸天亦不為過自唐尊孔子為文宣王已用天子禮樂宋真宗嘗欲封孔子為帝或謂周止稱王不當加帝號而羅從彥之論則謂加帝號亦可至周敦頤則以為萬世無窮王祀孔子邵雍則以為

仲尼以萬世為王其辨孔子不當稱王者止吳澄一人而已伏望博考羣言務求至當時貫疏中言莫尊於天地亦莫尊於父師陛下敬天尊親不應獨疑孔子王號為僭帝因大怒疑貫借此以斥其追尊皇考之非詆為奸惡下法司會訊褫其職給事中王汝梅等亦極言不宜去王號帝皆斥為謬論於是禮部會諸臣議人以聖人為至聖人以孔子為至宋真宗稱孔子為至聖其意已備今宜於孔子神位題至聖先師孔子去其王號及



大成文宣之稱改大成殿為先師廟大成門為廟門其  
四配稱復聖顏子宗聖曾子述聖子思子亞聖孟子十  
哲以下凡及門弟子皆稱先賢某子左邱明以下皆稱  
先儒某子不復稱公侯伯遵聖祖首定南京國子監規  
制製木為神主仍擬大小尺寸著為定式其塑像即令  
屏撤春秋祭祀遵國初舊制十籩十豆天下各學八籩  
八豆樂舞止六佾凡學別立一祠中叔梁紇題啟聖公  
孔氏神位以顏無繇曾點孔鯉孟孫氏配俱稱先賢某

氏至從祀之賢不可不考其得失申黨即申張釐去其  
一公伯寮秦冉顏何荀况戴聖劉向賈逵馬融何休王  
肅王弼杜預吳澄罷祀林放蘧瑗盧植鄭衆鄭玄服虔  
范甯各祀於其鄉后蒼王通歐陽修胡瑗宜增入命悉  
如議行又以行人薛侃議進陸九淵從祀初洪武時司  
葦宋濂請去像設主禮儀樂章多所更定太祖不允成  
弘間少詹程敏政嘗謂馬融等八人當斥給事中張九  
功推言之并請罷荀况公伯寮蘧瑗等而進后蒼王通

胡瑗為禮官周洪謨所却而止至是以璵力主衆不敢  
違毀像盖用濂說先賢去留畧如九功言其進歐陽修  
則以濮議故也明年國子監建啟聖公祠成從尚書李  
時言春秋祭祀與文廟同日籩豆牲帛視四配東西配  
位視十哲從祀先儒程昞朱松蔡元定視兩廡輔臣代  
祭文廟則祭酒祭啟聖祠南京祭酒於文廟司業於啟  
聖祠遂定制殿中先師南向四配東西向稍後十哲閔  
子損冉子雍端木子賜仲子由卜子商冉子耕宰子子

冉子求言子偃顓孫子師皆東西向兩廡從祀先賢澹  
臺滅明宓不齊原憲公治長南宮适高柴漆雕開樊須  
司馬耕公西亦有若琴張申張陳亢巫馬施梁鱣公皙  
哀商瞿冉孺顏辛伯虔曹恤冉季公孫龍漆雕哆秦商  
漆雕徒父顏高商澤壤駟赤任不齊石作蜀公良孺公  
夏首公肩定后處鄆單奚容蒧罕父黑顏祖榮旂秦祖  
左人郢句井疆鄭國公祖句茲原亢縣成廉潔燕伋叔  
仲噲顏之僕邾巽樂欬公西輿如狄黑孔忠公西蒧步

叔乘施之常秦非顏噲先儒左邱明公羊高穀梁赤伏  
勝高堂生孔安國毛萇董仲舒后蒼杜子春王通韓愈  
胡瑗周敦頤程顥歐陽修邵雍張載司馬光程頤楊時  
胡安國朱熹張栻陸九淵呂祖謙蔡沈真德秀許衡凡  
九十一人

王圻續通考嘉靖九年釐正祀典撤去塑像至聖先師  
孔子神位木主高二尺三寸七分闊四寸厚七分座高  
四寸長七寸厚三寸四分朱地金書四配神位木主各

高一尺五寸闊三寸二分厚五分座高四寸長六寸厚  
二寸八分十哲以下凡及門弟子皆止稱先賢某子神  
位木主各高一尺四寸闊二寸六分厚五分座高二寸  
六分長四寸厚二寸左邱明以下稱先儒某子神位木  
主各高一尺三寸四分闊二寸三分厚四分座高二寸  
六分長四寸厚二寸俱赤地黑書

明會典嘉靖九年令南京國子監祭用十籩十豆樂舞  
各止六佾凡六品以下官不陪祭者先一日赴廟瞻拜

其內臣降香亦罷

明世宗正孔子祀典說朕惟孔子之道王者之道也德王者之德也功王者之功也事王者之事也特其位非王者之位焉昨輔臣少傅張璉再疏請正其號稱服章等事已命禮部集翰林諸臣議正外惟號與服章二事所關者重不得不為言之孔子當周家衰時知其不能行王者之道乃切切以王道望於魯衛二國二國之君竟不能明孔子之道孔子既逝後世至唐玄宗乃薦謚

曰文宣加以王號至元又益其謚為大成夫孔子之於當時諸侯有僭王者皆筆削而心誅之故曰孔子作春秋而亂臣賊子懼孔子生如其死乃不體聖人之心漫加其號雖曰尊崇其實自為亂賊之徒是何心哉又我聖祖當首定天下之時命天下從祀孔子於學不許祀於釋老之宮又除去塑像止令設主樂舞用六佾籩豆以十可謂尊崇孔子極其至矣無以加矣特存其號豈無望於後人哉亦或當時創制未暇歟至我皇祖文



皇帝始建北京國學因元人之舊塑像猶存蓋不忍毀之也又至我皇祖考用禮官之議增樂舞用八佾籩豆用十二牲用熟而上擬乎祀天之禮也夫孔子設或在  
今肯安享之昔不觀魯僭王之禮寧肯自僭祀天之禮乎果能體聖人之心決當正之也至於稱王賊害聖人之甚孔子昔曰名不正則言不順言不順則事不成何其不幸身遭之哉夫既以王者之名而橫加於孔子故使顏回曾參孔伋以子而並配於堂上顏路曾皙孔鯉

以父而從列於下安有子坐堂上而父食於下乎此所謂名不正者焉皆由綱領一紊而百目因之以隳耳今也不正滋來世之非道將見子不父其父臣不君其君內離外叛可勝言哉

正祀典申說朕惟為人臣盡臣道盡之云者終始生死以之非有所私也孔子曰三年無改於父之道朱子釋之曰祖父所行之事不但三年雖萬世亦不可改也少有可變豈可待之三年大抵成法固不可改

其於一切事務不可不急於正之也朕又惟天子不可與匹夫相爭辨斯世斯時却不得不辨也昨所命議正孔子之祀典朕不知典籍且以易明者言之孔子之謚號自唐元宗李林甫之君臣始夫孔子已逝在秦漢之前此間豈無賢明之君如漢高祖唐太宗皆創業垂統者何不加王號於孔子則不敢擁虛名以示尊崇之意可知矣林甫之請元宗之加意必有為林甫之為臣何等臣也其意或假尊崇師道以欺

元宗歟元宗之所加也何其巧乎自秦而後王天下者稱皇帝漢方以王號封臣下元宗之封謚孔子何不以皇帝加之是不欲與之齊也特一王號猶封拜臣下耳尊崇之意何在哉蓋此王字非王天下之王實後世王公之王也由是武宗假托之而加謚宋徽宗薦十二章服徽宗之加欲掩其好道教而設此以尊崇耳况以諸侯王而薦天子之服章誣之甚也至於雕塑之像不知孔門弟子即孔子死時而造之且

如一人自是一人貌色不知可增損乎抑不可乎以一聖人而信工肆意雕塑曰此是孔子像也殊不知其實是土木之靈耳孔子肯依之享之推已之心則知孔子之心也又至於八佾之舞十二俎豆又僭禮之甚也決所當正

日知錄顧氏炎武曰理宗寶慶三年進朱熹淳祐元年進周敦頤張載程顥程頤景定二年進張栻呂祖謙度宗咸淳三年進邵雍司馬光以今論之惟程子之易傳朱子之四書章句集註易本義詩傳及蔡氏之尚書集傳胡氏之春秋傳陳氏之禮記集說所謂代用其書垂於國曹爾南軒之論語解東萊之

讀書記柳又次之而太極圖通書西銘正蒙亦羽翼六經之作也至有明嘉靖九年欲以制禮之功蓋其豐昵之失而逞私妄議輒為出入殊乖古人之旨夫以一事之瑕而廢傳經之祀則宰我之短喪冉有之聚斂亦不當列於十哲乎棄漢儒保殘守缺之功而獎末流論性談天之學於是語錄之書日增月益而五經之義委之榛蕪自明人之議從祀始也有王者作必遵貞觀之制乎

又云嘉靖之從祀進歐陽修者為大禮也出於在上之私意也進陸九淵者為王守仁也出於在下之私意也與宋人之進荀楊韓三子而安石封舒王配享同一道也

明會典啟聖祠嘉靖九年令兩京國子監并天下學校各建啟聖公祠中祀叔梁紇題稱啟聖公孔氏之位以

顏無繇曾點孔鯉孟孫氏配俱稱先賢某氏之位程珦  
朱松蔡元定從祀俱稱先儒某氏之位每歲仲春秋上  
丁日遣國子監祭酒行禮南監司業行禮

劉蒞四賢從祀奏浙江布政使司金華府知府等官  
劉蒞等奏昔孟軻氏歿吾道絕學周程張朱始續其  
傳朱熹之門黃幹乃其巨擘也熹臨終悉以深衣幅  
巾及平生遺書付之曰吾道之托盡在于矣若然則  
繼朱熹者非黃幹乎幹為臨川令婺州金華人何伯

慧適為縣丞因命其子何基師事焉告以聖賢之學  
悚惕受命於是因黃幹之言明朱熹之旨精義新意  
愈出不窮然則繼黃幹者非何基乎一傳而得同郡  
王栢盡探何基之秘而師道為之再盛然則繼何基  
者非王栢乎再傳而得同郡金履祥造詣益邃蓋然  
春融怡然冰釋訓迪後學誨切無倦觀其所充拓所  
論著蓋親得何王之傳而並擴之然則繼王栢者金  
履祥也又傳而得同郡許謙致遠鉤深以聖人為準



的旁搜博採以義理為折衷蓋盡得何王金之蘊而益充之然則繼履祥者許謙也是四子者皆親接黃幹之傳以上續朱熹之統寥寥三百年餘未從孔門之祀成化間按察司僉事辛訪亦嘗具奏未蒙准行議者曰羽翼斯道莫如著述何基所著大學中庸發揮大傳易啟蒙發揮通書近思錄發揮王栢所著讀易記涵古易說大象衍義涵古圖書書疑詩解說讀春秋記論語衍義太極衍義伊洛精義研几圖魯經

章句論語孟子通旨朱子指要詩可言天文地理考  
墨林考帝王歷數等書金履祥所著有論孟考證補  
集註之所未備通鑑前編多先儒之所未發其他如  
天文地理典章制度食貨刑法字學音韻等書皆發  
明聖道裨益程朱不少臣又嘗聞之朱子翼道之功  
李侗實啟之從彥實傳之今楊時既列從祀而從彥  
李侗不與則是曾元享祀而祖禰不與也臣望陛下  
隆重儒先紹續道統乞勅多官會議將羅從彥李侗

黃幹何基等七人加其封爵俾之從祀使其不至淪沒則聖道有光治道增重

蕙田案此疏上而不行故無年月可稽考蒞傳知金華時適當劉瑾敗後則亦嘉靖初年也而九年釐正祀典竟未之及觀其所議於朱子之後學脉源流最有關係附見於此以俟論定

明史禮志聖師之祭始於世宗奉皇師伏羲氏神農氏

軒轅氏帝師陶唐氏有虞氏王師夏禹王商湯王周文  
王武王九聖南向左先聖周公右先師孔子東西向每  
歲春秋開講前一日皇帝服皮弁拜跪行釋奠禮用羹  
酒果脯帛祭於文華殿東室初東室有釋像帝以其不  
經撤之乃祀先聖先師自為祭文行奉安神位禮輔臣  
禮卿及講官俟行禮訖入拜先是洪武初司業宋濂建  
議欲如建安熊氏之說以伏羲為道統之宗神農黃帝  
堯舜禹湯文武以次列焉秩祀天子之學則道統益尊

太祖不從至是世宗做其意行之十六年移祀於永明殿後行禮如初其後常遣官代祭隆慶初仍於文華殿東室行禮

明會典嘉靖九年初祀伏羲神農黃帝堯舜禹湯文武周公孔子凡十一位 一前期一日太常博士捧祝版於文華殿上填御名訖捧出 一正祭日早太常寺進籩豆祝帛陳設畢候上至行禮 一陳設每位劔一籩豆各二禮神制帛一白 一正祭是日上具皮弁服由

文華殿出內贊對引官導上至拜位奏就位上就御拜  
位內贊導上至伏羲氏前奏搢圭奏上香訖詣各神位  
前俱奏上香訖奏出圭奏復位上復位奏再拜訖讀祝  
官啟祝跪內贊奏跪上跪贊讀祝訖奏俯伏興平身讀  
祝官安祝退奏再拜訖贊焚祝帛上退拜位之東立捧  
祝帛官出門奏禮畢內贊對引導上出還宮 一祝文  
維年月朔日皇帝御名謹告於先聖先師暨周公孔子  
曰予惟後學之資必賴先聖遺集以為進修茲於明日

春開講學伏惟默運神機覺我後學俾誠正之功不替  
秋庶治平之至可臻而聖道永有沾民之惠矣特用奠告  
惟聖師鑒焉

春明夢餘錄嘉靖十年以釐正祀典服皮弁謁廟用特  
奠帛行釋奠禮迎神送神各再拜樂三奏文舞六佾配  
享從祀及啟聖祠分奠用酒脯亦遣官致祭於南監及  
闕里從大學士張璉議也

明史世宗本紀嘉靖十二年三月丙辰釋奠於先師孔

子

世宗實錄嘉靖十九年禮部覆薛瑄從祀議從祀之  
典崇德報功自漢以來大儒從祀代不乏人正統間  
以宋胡安國蔡沉真德秀元吳澄從祀弘治間以宋  
楊時從祀嘉靖九年又以宋陸九淵從祀而累朝諸  
臣俱嘗請以本朝禮部侍郎薛瑄從祀案瑄山西河  
津縣人年甫幼學一見濂洛之書歎曰此學道之正  
脉也即焚棄詞賦以程門居敬窮理為學之法以孟



子復性為學之功由壯至老造詣純篤蓋見於大學  
士李賢尚書彭韶國子監丞閻禹錫等所撰行狀碑  
文者如此瑄所著有讀書錄十卷今觀其書格言要  
論發明理道每有新得非體認密切踐履真實者不  
能至於立朝行已風槩卓絕有功名教可謂豪傑之  
崛起聖門之宗裔矣若朝廷特加褒顯進之從祀誠  
足以慰衆論之公彰聖朝之美也然或者之論以為  
前代所定從祀必求傳釋六經之人先年亦嘗下儒

臣議薛瑄從祀然卒鮮有成議者以罕所著述疑之也臣等切惟求士於漢唐之世聖學榛塞固當專錄其釋經之功自有宋諸儒繼出理學大明之後世之儒者雖論述罕傳似當特取其履行之實惟是侑坐孔庭受職嘉享事重禮殷其選不得不慎臣等謹案漢法有大事中朝逮文學掌故皆以其議上號為近古今祀典重事必下廷議集衆思斯於事體為得奉旨着翰林院詹事府左右春坊司經局國子監堂官

人各上議諸臣議上謂當祀者二十三人謂姑緩者二人謂不必祀者郭希賢一人禮部覆議薛瑄從祀始見請於臺章繼詳延於廷議集衆之詞無或疵議而庶子童承叙謂程朱高弟如羅從彥李侗尹焞黃幹尚未得祀近時儒者如吳與弼胡居仁陳獻章亦應從祀舍彼取此似為未徧贊善浦應麒亦曰俟之後世二臣之言無非以論必久而後定故聚訟之議不嫌異同此慎重祀典之意也臣等惟薛瑄之造詣

其視宋儒雖若有間然實為本朝理學之倡必若從祀無以踰瑄若與弼諸人亦皆為一時士論之所推許但時同地近臣等難以軒輊決擇於其間矣夫衆言折諸聖人議禮本諸天子伏乞特賜睿斷以垂式萬世又看得尚書霍韜奏內欲將宋臣司馬光陸九淵議黜從祀夫司馬光平生所學惟是濮王之議失父子之倫委為昧禮若其公忠鯁亮勲業偉俊為宋一代名臣無問賢不肖皆知尊信似未可以一眚病

之陸九淵資稟高明見道超悟據其學術論議當在  
薛瑄之右今議進瑄則九淵似難遽罷臣等又看得  
司直呂懷奏內欲將道統正傳皆欲進廟堂系四配  
之下夫十哲四科之賢親受聖教者也濂洛諸儒似  
難越居其上合照舊祀嘉靖十九年三月初五日奉  
旨聖賢道學不明士習趨流俗朕深有感焉薛瑄能  
自振起誠可嘉尚但公論久而後定宜俟將來司馬  
光陸九淵從祀與四配等位次具歷代秩祀又經太

祖欽定照舊不許妄議

蕙田案霍韜議黜溫公為大禮也其心術無  
往而非私矣

穆宗本紀隆慶元年三月癸未朔釋奠於先師孔子  
禮志隆慶五年以薛瑄從祀

王圻續通考先是戶科給事中魏時亮於隆慶元年  
十月請錄真儒以彰道化薛瑄陳獻章王守仁均得  
聖學真傳宜從祀孔廟先是給事中趙軌御史周弘

相請以故禮部侍郎薛瑄從祀御史耿定向亦請以  
故新建伯兵部尚書王守仁從祀下禮部議覆五年  
十三道御史馬三樂等交章請以薛瑄從祀於是命  
瑄從祀神主序於先儒呂祖謙之下祭酒馬自強以  
從祀告於先師孔子行釋菜禮通行天下學校

神宗本紀萬歷四年八月壬戌釋奠於先師孔子

禮志萬歷中以羅從彥李侗從祀十二年又以陳獻章  
胡居仁王守仁從祀

沈鯉議從祀疏臣等哀集衆論較量其間預廷議者共四十一人除註有原疏外內註胡居仁從祀者二十五人註王守仁陳獻章者俱十五蔡清五人羅倫二呂一人居仁則仍有專舉且無疵議及臣等考其生平與其論著亦大都淵源孔孟純粹篤實一時名士皆極口稱上比於薛瑄而次其論著與瑄之讀書錄並傳焉斯其為孔子之徒已彰明較著有歸一之論矣至如守仁之學在致良知獻章之學在於主靜



皆所謂豪傑之士但預議諸臣與之者僅十三四不與者已十六七甲可乙否殊未有歸一之論以稱上意指臣等請暫緩之以少俟公論之定而徐議於後是亦未晚至如蔡清羅倫章懋黃仲昭陳真晟呂柟羅欽順鄒守益中間或未有專祀者亦望推廣德意專祀於鄉通候論定之日另議從祀

萬歷二十三年以宋周敦頤父輔成從祀啟聖祠又定每歲仲春秋上丁日御殿傳制遣大臣祭先師及配位

其十哲以翰林官兩廡以國子監官各二員分獻每月朔及每科進士行釋菜禮司府州縣衛學各提調官行禮牲用少牢樂如太學京府及附府縣學止行釋菜禮明會典配哲從祀牌位 四配復聖顏子宗聖曾子述聖子思子亞聖孟子 十哲先賢閔子先賢冉子先賢端木子先賢仲子先賢卜子先賢冉子先賢宰子先賢冉子先賢言子先賢顓孫子 東廡先賢澹臺滅明原憲南宮适商瞿漆雕開司馬耕有若巫馬施顏辛曹卹

公孫龍秦商顏高壤駟赤石作蜀公夏首后處奚容蒧  
顏祖句井疆秦祖縣成公祖句茲燕伋樂欬狄黑孔忠  
公西蒧顏之僕施之常秦非申棖顏噲先儒穀梁赤高  
堂生毛萇后蒼杜子春韓愈程顥邵雍司馬光胡安國

楊時張栻陸九淵許衡

舊有堂邑侯顏何蘭陵伯荀况  
彭城伯劉向司空王肅司徒杜

預今黜中年伯鄭衆良鄉伯盧植滎陽伯服虔今改祀  
於鄉萊蕪侯曾點泗水侯孔鯉改入啟聖祠從祀

西廡先賢宓不齊公治長公督哀高柴樊須公西赤梁  
鱣冉孺伯虔冉季漆雕徒父漆雕哆商澤任不齊公良

孺公肩定鄭單罕父黑榮旂左人郢鄭國原亢廉潔叔

仲會公西輿如邾巽陳亢琴張步叔乘先儒左邱明公

羊高伏勝孔安國董仲舒王通周敦頤歐陽修張載程

頤胡瑗朱熹呂祖謙蔡沈真德秀薛瑄王守仁陳獻章

胡居仁

舊有壽張侯公伯寮新息侯秦冉考城伯戴聖岐陽伯賈逵扶風伯馬融任城伯何休偃師伯

王弼今黜內黃侯蘧伯玉長山侯林放高密侯鄭玄新野伯范甯臨川郡公吳澄今改祀於鄉曲阜侯顏無繇

改入啟聖祠從祀淄川侯  
申黨即申棖今草存棖

蕙田案配享從祀代有損益必各隨時世編

輯乃便稽考此會典所載神位蓋嘉靖釐正以後隆慶復增薛文清萬歷復增陽明白沙康齋會典綜其全局載於洪武二十六年釋奠儀之下而王圻續通考承用之於是有先得列名後復議祀者有前本無名後復議黜者四配之父先列之啟聖祠而後復有以明倫為言者甚則薛王陳胡俱見諸洪武祀典不已舛乎

王圻續通考萬歷四十一年提學僉事熊尚文請祀宋  
儒羅從彥李侗禮部覆以程朱擬孔孟謂孔有曾思而  
後孟子接其傳程得羅李而後朱子行其緒羅李之功  
與曾思等宜將二賢列宋儒楊時之下入廟從祀詔從  
之

明史熹宗本紀天啟五年三月甲寅釋奠於先師孔子  
莊烈帝紀崇禎二年春正月丙子釋奠於先師孔子  
春明夢餘錄崇禎六年辛巳八月復行釋奠禮

十四年八月諭朕覽我聖祖命儒臣纂輯五經四書大全其中作述傳註引證等項惟宋儒周子兩程子朱子張子邵子為多可見理學大明於宋而周程諸子大有功於聖門然與周秦漢唐諸儒並稱先儒竊為不安部議周程六子宜稱先賢並請漢儒董仲舒隋儒王通俱稱先賢且宋從祀至十八人今止四人為大少宜以吳與弼羅倫倫蔡清陳真晟陳琛呂柟王艮章懋羅洪先鄧元錫顧憲成等令候旨行

明史莊烈帝紀崇禎十四年八月辛酉重建太學成釋奠於先師孔子

表忠記十四年國學新修帝再臨視時真人張應京從請坐大學士蔣德璟議斥不許

禮志崇禎十五年以左丘明親授經於聖人改稱先賢并改宋儒周二程張朱邵六子亦稱先賢位七十子下漢唐諸儒之上然僅國學更置之闕里廟廷及天下學宮未遑頒行也



右明

蕙田案孔廟配享之典顏子定於三國魏正  
始二年曾子定於唐睿宗太極元年子思定  
於宋度宗咸淳三年孟子定於宋神宗元豐  
七年其從祀七十子定於後漢明帝永平五  
年左公穀及漢魏以後釋經諸人定於唐太  
宗貞觀二年周程張先賢定於宋理宗端平  
二年其間進退升降遞有遷改求其義旨大

約有二一曰傳道一曰傳經然有經與道合者有經與道分者夫由堯舜禹湯文武周公至於我孔子孔子刪定纂修集羣聖之大成聖人之門若曾子之大學子思之中庸孟子之七篇皆經與道合者也自七十子沒而微言絕大義乖先王之道幾於墜地賴有伏生高堂毛鄭孔賈諸儒抱殘守缺以全於後其功不可泯沒而其間如董江都文中子韓昌

黎則又能稍窺大道之要皆得並列祀典此則經與道分矣夫道與經無可分之理然當時會遷流亦出於勢之不得不然逮乎前朝或以真儒碩學不見著作為疑或以註疏專家不修實行被黜其意似欲強而合之然不如明嘉靖時禮臣之議謂求士於漢唐之世聖學榛蕪固當專錄其釋經之功自有宋諸儒出理學大明雖議論罕傳自當特取其履

行之實為篤論也今據其說而詳考宋元明  
諸儒其不愧傳道之列者宋則周元公崛興  
數千載之後上接鄒魯而二程張邵朱子相  
繼而興其淵源所在程子之門則由楊龜山  
時羅仲素從李延平侗而遞傳於朱子朱子  
之門由黃勉齋幹何文定基王文憲栢金文  
安履許文懿謙而遞傳於方正學孝皆一線  
之宗派若夫薛文清瑄振起於河汾王文成

守倡道於姚江顧端文憲成高忠憲攀龍集成於

東林皆真修實悟以道統為己任而詣極最

高其他宋之胡安定瑗陸文安九淵張南軒栻

呂成公祖謙真西山德秀蔡元定仲默沈元之許


魯齋衡明之曹靖修端吳康齋與弼胡敬齋居仁

陳白沙獻章羅文恭洪先劉念臺宗周皆一代真儒

潛心正學今觀祀典所載精求博議蓋亦極

其矜慎然或以代近而公議未孚或以後起

而推崇未及蓋有之矣若夫名臣如司馬歐陽固當酌祀於帝王之廟而不必以類宮之俎豆為定論也



五禮通考卷一百二十